

四庫全書

集部

欽定四庫全書

集部

會稽掇英總集卷十四至十六

詳校官中書臣張經田

助教臣常循覆勘

總校官庶吉士臣倉聖脉

校對官中書臣田尹衡

謄錄監生臣龐兆懋

欽定四庫全書

會稽掇英總集卷十四

宋 孔延之 撰

經蘭亭故池聯句

元本不注名
姓於聯句下

曲水邀歡處遺芳尚宛然
名從右軍出山在古人前

蕪沒成塵迹規模得大賢
湖心舟已並村步騎仍連

賞是文辭會歡同癸丑年
茂林無舊徑脩竹起新煙

宛是崇山下仍依古道邊
院開新勝地門占舊畬田

荒阪披蘭築枯池帶墨穿
序成應唱道杯得每推先
空見雲生岫時聞鶴唳天
滑苔封石磴密篠礙飛泉
事感人寰變歸慙府服牽
寓時仍覩葉歎逝更臨川
野興攀藤坐幽情枕石眠
翫奇聊寄策尋異稍移船
草露猶霑服松風尚入絃
山遊頗同調今古有多篇

松花壇茶宴聯句

幾歲松花下今來草色平
衣冠遊佛剎鼓角望軍城
亂竹邊溪暗孤雲向嶺明
遶壇煙樹老入殿雨花輕

山磬人天界風泉遠近聲
夜禪三世晤朝梵一章清
上砌莓苔遍緣窓薜荔生
焚香忘世慮啜茗長幽情
聚土何年置修心此地成
道緣雲起滅人世月虧盈
蟬噪林當曉虹生澗欲晴
水流驚歲序塵網悟簪纓
池上蓮無著籬間槿自榮
因知性不染更識理常精
從此應貪味非唯悔近名
山栖多自愜林卧欲無營
已接追涼處仍陪問法行
賞心殊未徧惆悵暮鐘鳴

尋法華寺西溪聯句

常願山水遊靈竒賞皆遍賈弇雲端訪潭洞林下徵茂

彥

闕初允

枕石愛閒眠尋源樂清宴呂渭探幽漸有趣憑

險恣流眄

張叔政

竹影思掛冠湍聲忘搖扇鮑防旁登樵

子徑却望金人殿周頌

蘿葉朝架煙松花暮飛霞

闕成

蟬聲掩清管雲色緣素練鄭槩從事暮澄清看心得方

便嚴維

攀崖屢迴互絕跡無健美

闕初允

野客歸路逢山

僧入林見

賈弇

雲林會獨往世道從交戰

鮑防

塔廟年

代深雲霞朝夕變

周頌

潛流注隈隩觸石乍踐濺

闕成

逸興發山林道情忘貴賤鄭槩臨流日復夕應接空無

倦嚴維

雲門寺小溪茶宴懷院中諸公

喜從林下會還憶府中賢嚴維石路雲門裏花宮玉筍

前謝良弼日移侵岸竹溪引出山泉裴晁猿飲無人處琴

聽淺溜邊呂渭黃梁誰共飯香茗憶同煎鄭槩暫與真

僧對遙知靜者便明允清言皆疊疊佳句又翩翩庾騫

竟日懷君子沈吟對暮天賈肅

徵鏡湖故事

將尋鍊藥井更逐賣樵風

開元初

刻石秦山上探書禹穴

中

呂渭

溪邊尋五老橋上覓雙童

嚴維

梅市西陵近蘭

亭上道通

謝良弼

雷門驚鶴去射的驗年豐

賈肅

古寺思

王令孤潭憶謝公

鄭燁

帆開岩上石劍出浦間銅庾駸

興裏還尋戴東山更向東

裴晁

自雲門還泛若耶入鏡湖寄院中諸公

山中秋賞罷溪上晚歸時

謝良弼

出谷秦人望經湖謝客

期呂渭日斜愁路遠風橫畏舟遲鄭槩章句懷文友途

程問檝師嚴維淺沙游蚌蛤危石起鷗鷗裴冕落葉飛

孤戍橫塘向古祠調允初行行多興逸無處不相思蕭幼和

秋日宴嚴長史宅

北客來江外秋山到越中鄭槩故交多此見清興復能

同裴冕落木秦山近衡門鏡水通嚴維簷前苔繞砌籬

下菊成叢徐嶷泣泣花承露泠泠葉動風鄭槩卷簾看

彩翠對酒命絲桐張著戊日辭巢燕商天向浦鴻范絳

騫開通細雨笑語望秋空

劉全白

嬾竹霜天綠殘花醉裏

紅

闕仲昌

客游驚落葉更使恨風蓬

闕名

嚴氏園林

六字

策杖山橫綠野乘舟水入衡門

嚴維

客來多從業縣僧

去還指煙村

鄭槩

春韭青青耐剪香粳日日宜飧

王綱

自愧薄霑冠冕何如樂在丘園

闕仲昌

鳥散紛紛花落人

行處處苔痕

賈全

水池偏多白鷺畦隔半是芳蓀

段格

柳徑共知歸郭暮雲誰使當軒

劉題

柏梁體狀雲門山物序

秦瑀

狀比也比與釋氏有藥草論品詩家則六義之一焉義
取覩物臨事君子早辯不當有似是而非採詩之官可
得而補缺矣無以小言默無以細言棄相尚佳句題於
層閣古者稱會必賦其能闕乎星郎主文實賦所以中
儔也

幡竿映水出蒲檣

秦瑀

榴花向陽臨鏡粧

鮑防

子規一

聲猿斷腸

闕

聿

殘雲入戶起爐香

李清

晴虹天矯架危

梁杜弈

輕羅縹緲挂霓裳素豔

月臨影殿玉毫光呂渭

粉帶新篁白簡霜

崔泌

玲瓏珠綴魚網張

初允

高枝反

舌巧如篁

鄭槩

風搖寶鐸佩鏘鏘

秦瑤

古松擁腫懸如

囊杜倚

雨垂珠箔映迴廊

調韋

薔薇綠刺半鍼長鮑防

五粒松英大麥芒

李清

古藤蚴蟺毒龍驤

杜弈 深林怪

石猛虎藏

素豔

古碑勒字碁局方

呂渭

山僧行道鴻雁

行崔泌

亭亭孤笋綠沈槍

鄭槩

蜂窠倒挂枯蓮房

初允

燃燈幽殿星煌煌

杜倚

花嚴寺松潭

山下花嚴會松間水積深

張叔政

晚荷交亂影疎竹引輕

陰嚴維

雲散千巖暮風生萬木吟

呂渭

循涯通妙理步

勝獲幽尋

賈奔

望鳥知無跡看猿欲學心

周頌浮榮指

西景微尚寄東岑

鄭槩

待月開山閣聞鐘出石林

闕初

波文搖翠壁蟬響續幽琴

張叔政

永日陪霜簡通宵聽梵

音

賈奔

機閒任情性道勝等浮沈

闕成

賞異方終古佳

遊幾度今嚴維

自然輕執簡寧敢忘抽簪

闕允

過見心

皆妄驅馳力未任呂渭從來謝公意山水愛登臨周頌

入五雲溪寄諸公聯句

從一字至九字

東西絕防步月尋溪嚴維鳥已宿猿又啼鄭槩狂流礙

石迸笋穿蹊

用成

望望人煙遠行行蘿徑迷呂渭探題

只應盡墨持贈更欲封泥

初允

松下流時何歲月雲中

幽處屢攀躋

張叔政

乘興不知山路遠近緣情莫問日過

高低

賈弇

靜聽林下潺潺足湍瀨厭聞城中喧喧多鼓

鼙

周頌

登法華寺最高頂憶院中諸公

從一字至九字

身心

周頌

城郭山林

闕成用

望處遠到時深

張叔政

雲崖杳

杳煙樹沈沈

賈弇

嘯侶時停策探幽或撫琴

闕

得法

小枝小葉懷人如玉如金

嚴維

月色前庭清靜觀梵聲

初夜海潮音

呂渭

思君子山深不可見登高頂望遠欲

相尋

鄭槩

何事歸舟客興棹不駛君不見紅蓮綠荇沙禽

闕允
初

會稽掇英總集卷十四

欽定四庫全書

會稽掇英總集卷十五

宋 孔延之 撰

憶越州 陳堯佐

稽峰倚雲千仞高澄湖倒影分秋毫當年逸賞有餘意
徘徊不忍移輕舠

又

抽毫欲賦東南奇雲山好景慙有遺平波蕩漾照湖淥

扁舟憶得遊春時

和張士遜

稽山巖壑深復高思之誰妙丹青毫霜縑若得一千幅
伴圖何必乘蘭舫

又

平湖八百里多奇君曾縱賞無餘遺不知風月誰為主
夷猶未必如當時

和晏殊

鑑湖清澈秦望高涵虛逗碧供吟毫當時醉眼倚空濶
三江七澤才容舸

又

湖山杳渺不可狀登覽幽求無所遺高僧伴吟足清覽
見盡白蓮開落時

和呂夷簡

賀監湖邊山斗高水軒水塢頻抽毫吟餘清興杳無際
揭篷聽雨登漁舸

又

雲門雪竇阻清賞恍然目想心如遺前溪後溪月上處
千山萬山花發時

和薛奎

照湖方干吟格高搜清研奇含爛毫天中無雲水中月
虛明晶曜忘迴舫

又

千巖萬壑爭清奇天地靈秀應無遺吟舟恐在碧霄上

湖心澄波涵月時

和王隨

賀監賜湖名價高雲山吟賞抽江毫澄波香渺醉欲去
煙光水月留歸舸

又

越山湖山何絕奇昔聞尋勝寧遐遺烟波無憶舊吟醉
方是致君堯舜時

題袁秀才林亭方干

清邃林亭指畫開幽巖別派象天台坐牽蕉葉題詩句
醉觸藤花落酒盃白鳥不歸山裏去紅鱗多自鏡中來
終年此地為吟侶早起尋君薄暮迴

觀會稽圖

褚朝陽

良使求圖籍工人巧思饒全移會稽郡不散浙江潮夏
禹猶卑室秦皇尚斷橋宛然山水趣誰道故鄉遙

宴榮二山人池亭

孟浩然

甲第開金穴榮期樂自多樵嘶支遁馬池養右軍鷺竹

引攜琴入花邀載酒過山公來取醉時唱接籬歌

水寺 李紳

煙波野寺經過處水國蒼茫夢想中雲散浦開江月迥
日曛舟暗海潮通坐看魚鳥沈浮遠靜見樓臺上下同
聞道化城方便諭只應從此到龍宮

新泉 當附雲門寺

僧靈一

泉源新湧出洞徹映纖雲稍落芙蓉沼初淹苔蘚紋了
將空色淨素與衆流分若對清宵月冷然夢裏聞

望越亭

史館王相

亂山千頃翠相圍
衮衮滄江去復歸
安得病身生羽翼
長隨沙鳥自由飛

越上聞子規

范仲淹

夜入翠烟啼晝尋
芳樹飛春山無限
好猶道不如歸

諸暨道中作

范仲淹

林下提壺招客醉
溪邊杜宇勸人歸
可憐白酒青山在
不醉不歸多少非

越中五詠

林槩

越絕烟光隱翠微
蘭亭春色送行衣
風清漢相鳴樵徑
臺古任公落釣磯
繡被歌殘人竟遠
桃花源靜客忘歸
憑君莫上秦山望
千古驪宮對夕暉

野亭讌集

林槩

碧樹陰穠曲沼濱
賞心何處樂遊頻
東吳景物蘭亭晚
西洛煙光梓澤春
香散落梅忘怨笛
綠鋪幽草妬芳茵
風雲流散苦無定
且學陽池倒載身

離席

林槩

何處驪駒雜楚歌
楚人歸思託雲蘿
河陽望竟妾心遠
金谷別來郎恨多
往事一春空物態
閒情千里舊風波
歸時莫聽隴頭水
腸斷不禁年少何

西村

林槩

綠郊凝望久徘徊
落日川原映古臺
江上晚風三弄笛
隴頭春信一枝梅
東西陌外煙光度
紫翠峰前霽色開
不是羅敷莫迴首
城南五馬使君來

野塘 林攄

漠漠橫塘一水通
霏霏輕靄夕陽中
吳娘晚唱穿菱葉
楚客春心託蕙叢
煙外薰葭間倚路
波間舴艋半凌風
江南景好遊人去
二月大堤花豔紅

得越 張伯玉

尺一除書與會稽
陋儒何以報天輝
豈惟太幕張紅旆
更得全家住翠微
千騎晚隨龍節去
一帆春送鷁舟飛
支離莫道攘空臂
乞得越州金印歸

清明日

張伯玉

每年每遇清明節把酒尋花特地忙
今日江城衰病起
佛前新火一爐香

正旦呈諸僚友

張伯玉

拂霧酴酥酒滿巡越山如鬣水如鱗
日邊雖望龍庭遠
海上初傳鳳歷新
好景融融來破雪
和風細細欲黏人
莫言老守無心計
排比賓僚醉過春

臘日喜雪

張伯玉

臘雪常聞百厲銷今年臘日雪飄飄
山公預喜明年熟
擘畫開春買酒瓢

過越趙諮

地有千巖與萬津
霸圖無計老青春
抱冰謾刷樓山恥
爭奈傾吳是婦人

判官廳新建壽樂堂沈立

會稽四面是湖山
亭在湖山勝絕間
欄檻旋移芳草種
襟懷長伴白雲閒
乍登頓覺詩毫健
縱賞惟憂酒量慳

更是人生最榮處
綵雲朝暮奉慈顏

登會稽山

孫逖

稽山碧湖上
勢入東溟盡
煙景畫清明
九峯爭隱嶙
望中厭朱紱
俗內探玄牝
野老聽鳴騶
山童擁行軫
僊花寒未落
古蔓柔堪引
竹澗入霜多
松崖向天近
雲從海人去
日就江村隕
能賦丘嘗聞
和歌參不敏
冥搜信沖漠
多士期標準
願奉濯纓心
長謠反招隱

採蓮曲

李白

若耶溪傍採蓮女笑隔荷花共人語日照新粧水底明
風飄香袂空中舉岸上誰家遊冶郎三三五五映垂楊
紫騮嘶入落花去見此踟躕空斷腸

採蓮

賀知章

稽山罷霧鬱嵯峨鏡水無風也自波莫言春度芳菲盡
別有中流採芰荷

春集皇甫秀才山亭

孟郊

嘉賓在何處置亭春山巔顧余寂寞者謬廁芳菲筵視

聽日澄澈聲光坐連綿晴湖瀉峯嶂翠浪多萍蘚何以
逞高志為君吟秋天

題越臺

張洎

我愛真人居高臺倚寥泐洞天開兩扉邈爾與世絕縹
緲乘鸞女華顏映綠髮舉手拂煙虹吹笙弄松月森羅
窺萬象境異趣亦別何必服金丹飛身向蓬闕

粵俗

謝景初

粵俗嗜海物鱗介無一遺蝦羸味已厚況乃蟹與蜆潮

來浦嶼漲遮捕張藩籬潮去沙滿灘拾掇盈籬箕殺烹
數莫記瑣碎臭且奇苟務貪咀嚼寧識暴殄悲蛟蜃吐
雲氣腹以人為飴呀口日肥大洪波誰敢窺

判官廳新建壽樂堂

蘇軾

青山偃蹇如高人常時不肯入官府高人自與山有素
不待招邀滿庭戶卧龍蟠屈半東州萬室鱗鱗枕其股
背之不見與無同狐裘反衣無乃魯張君眼力覩天奧
能使荊棘化堂宇持頤宴坐不出門收覽奇秀得十五

才多事少厭閒寂卧看雲烟變風雨筍如玉筋堪如簪
強飲且為山作主不憂兒輩知此樂但恐造物怪多取
春濃睡足午窓明想見新茶如潑乳

雲門寺濟公上方偈鮑防

已酉歲僕忝尚書郎司浙南之武時府中無事墨客自
臺省而下者凡十有一人會雲門濟公之上方以偈者
贊貲之流也始取於佛事云

護戒刀偈

剖妄妄絕 決機機壞 彼堅剛刀 護聲聞戒

茗侶偈

李聿

采采春渚 芳香天與 滌慮破煩 靈芝之侶

芭蕉偈

杜弁

幽山淨土 生此芭蕉 無心起喻 覺路非遙

山啄木

爾禽啄木 惡蠹傷木 愈木無病 巢枝自足

澡瓶偈

靈圓取相 塵垢是澡 定水清淨 救彼熱惱

山石榴偈 鄭槩

何方而有 天上人間 色空我性 對爾空山

灑水囊偈 杜倚

裂素成器 給我救彼 密淨圓靈 護生絜水

藤偈 李邕

得彼柔性 契茲佛乘 豈無衆木 我喻垂藤

薔薇偈 崔泌

護草木性 植彼薔薇 眼根不染 見爾色非

班穀杖偈

護性維戒 扶身在杖 動必由道 心無來往

題天章寺偈

任達

降伏心住 自在心住 有心且住 無心即住

會稽掇英總集卷十五

欽定四庫全書

會稽掇英總集卷十六

宋 孔延之 撰

越世家史辭 司馬遷

太史公曰禹之功大矣漸九川定九州至於諸夏艾安
及苗裔勾踐苦身焦思終滅彊吳北觀兵中國以尊周
室號稱霸王勾踐可不謂賢哉蓋有禹之遺烈焉范蠡
三遷皆有榮名名垂後世臣主若此欲毋顯得乎

秦德頌李斯

皇帝休烈平一宇內德惠修長三十有七年親巡天下
周覽遠方遂登會稽宣省習俗黔首齋莊羣臣誦功本
原事迹追首高明秦聖臨國始定刑名顯陳舊章初平
法式審別職任以立恒常六王專倍貪戾傲猛率衆自
彊暴虐恣行負力而驕數動甲兵陰通間使以事合從
行為辟方內飾詐謀外來侵邊遂起禍殃義威誅之殄
熄暴悖亂賊滅亡聖德廣密六合之中被澤無彊皇帝并

宇兼聽萬事遠近畢清運理衆物考驗事實各載其名
貴賤並通善否陳前靡有隱情飾省宣義有子而嫁倍
死不貞防隔內外禁止淫泆男女絜誠夫為寄戮殺之
無罪男秉義程妻為逃嫁子不得母咸化廉清大治濯
俗天下承風蒙被休經皆遵度軌和安敦勉莫不順令
黔首修絜人樂全則嘉保太平後敬奉法常治無極輿
舟不傾從臣誦烈請刻此石光垂休銘

曹娥碑

邯鄲淳

孝女曹娥者上虞曹盱之女也其先與周同祖末曹荒沈
爰茲適居盱能撫節按歌婆娑樂神漢安二年五月時
迎伍君逆濤而上為水所淹不得其屍娥時年十四號
慕思盱哀吟澤畔旬有七日遂自投江死經五日抱父
屍出以漢安迄於永嘉青龍辛卯莫之有表度尚設祭
誄之辭曰

伊惟孝女曄曄之姿偏其反而令色孔儀窈窕淑女巧
笑倩兮宜其家人在洽之陽大禮未施嗟喪慈父彼蒼

伊何無父孰怙訴神告哀赴江永號視死如歸是以耿
然輕絕投入沙泥翩翩孝女載沈載浮或泊洲嶼或在
中流或趨湍瀨或逐波濤千夫失聲悼痛萬餘觀者填
道雲集路衢泣淚掩涕驚動國都是以哀姜哭市杞崩
城隅或有刻面引鏡斃耳用刀坐臺待水抱柱而燒鳴
呼孝女德茂此儔何者大國防禮自修豈沈庶賤露屋
草茅不扶自直不斷自雕越梁過宋比之有殊哀此貞
勵千載不渝嗚呼哀哉銘曰

名勒金石 質之乾坤 歲數歷祀 立廟起墳 光
于后土 顯昭天人 生賤死貴 利之義門 何悵
花落 飄零乃分 葩豔窈窕 永世配神 若堯二
女 為湘夫人 時効髣髴 以昭後昆
後漢蔡邕題其碑陰云

黃絹幼婦 外孫齋曰

梁建安王造剡山石城寺石像碑

劉勰

夫道源虛寂冥機通其感神理幽深玄匠思其契是以

四海將寧先集威鳳之寶九河方導已致應龍之書况
種智圓照等覺徧知揚萬化於大千擒億形於法界當
其雲起攝誘之權影現遊戲之力可勝言哉自優曇發
華而金娑誕應娑羅變葉而塔像代興月喻論其跡隱
鏡譬辯其常照所以刻香望燦而自移畫木趣井而懸
峙金剛泛海而遶集石儀浮滄以遙渡並造由人功而
瑞表神力形器之妙猶或至此法身之極庸詎可思觀
夫石城初立靈證發於草創彌勒建像聖驗顯乎鐫刻

原始要終莫非禎瑞剡山峻絕競爽嵩華澗岨燭銀岫
嗽蘊玉故六通之聖地八輩之奧宇始有曇光比丘雅
修遠離與晉世于蘭同時並學蘭以慧解馳聲光以禪
味消形影歷遊巖壑晚屆剡山遇見石室班荆宴坐始
有雕虎造前次有丹螭依足各受三皈茲即引去後見
山祇盛飾造帶訏談光說以苦諦神奉呂崖窟遂結伽藍
是名隱岳後蘭公初寺號曰元花茲密通石城而拱木
扃阻伯鸞所未窺子平所不值似石橋之天斷猶桃源

之地絕荒茫以來莫測年代金剛欲基斯路自啓野人
伐木始通山谿翦棘藝麻忽聞空響此是佛地不可種
植心悟神封震驚而止又光公禪室耳屬東巘常聞絃
管韻動霄漢流五結之妙聲凝九奏之清響由是茲山
號為天樂至齊永明四年有僧護比丘刻意苦節戒品
嚴淨進力堅猛來憩隱嶽游觀石城見其南駢兩峯北
疊峻嶸東竦圓岑西引斜嶺四嶂相銜鬱如鷲岳曲間
微轉煥若龍池加以削成青壁當於前巘天誘其衷神

啓其慮心畫目準願造彌勒敬擬千尺故坐形十丈於
是擎爐振鐸四衆爰始胥宇命曰石城遂輔車兩寺鼎
足而處克勤心力允集勸助疏鑿積年僅成面璞此外
則碩樹朦朧巨藤交梗後原燎及崗林焚見石有自然
相光正環像上兩際圓滿高巖峰銳勢起匠楷功踰琢
磨法俗竦心邑野驚觀僉曰冥造非今朝也自護公神
遷事異人謝次有僧淑比丘纂修厥緒雖劬勞招獎夙
夜匪懈而運屬齊末資力莫由千里廢其積跬百仞虧

其覆篋暨我大梁受厯道鑄域中秉玉衡而齊七政協
金輪而教十善地平天成禮被樂洽瞻行衢而交讓巡
比屋其可封慈化穆以風動慧教渙以景燭般若熾於
香城表刹嚴於淨土希有之瑞旦夕鱗集難值之寶歲
時輻輳鎮南將軍江州刺史建安王道性自凝神理獨
照動容立禮發言成德英風峻於閭平茂績盛乎魯衛
自皇運惟新宣力邦國初鎮樊沔遷牧派江酌實樹聲
鞅掌於民政率典頒職密勿於官府炎涼舛和爰動勞

熱寢味貶常興居睽豫仁深祚遠德滿慶鍾乘茲久禱
之福將致勿藥之喜所以休禎玄會妙應旁通有始豐
縣令吳郡陸咸以天監六年十月二十二日罷邑旋國
夕宿剡溪值風雨晦冥驚湍奔壯中夜震惕假寢危坐
忽夢沙門三人乘流告曰君識性堅正自然安隱建安
王感患未痊由於微障剡縣僧護造彌勒石像若能成
就必獲康復冥理非虛宜相開導咸還都經年稍忘前
夢後出門遇僧云聽講寄宿因言去歲剡溪風雨之夜

囑建安王事猶憶此否咸當時憮然答以不憶道人笑
曰但更思之仍即辭去不肯留止心悟非凡倒屣諮訪
而慢色頗形詭辭難領拂衣高逝直去靡回百步追及
忽然不見咸霍爾意解且憶前夢乃剡溪所見第三人
也再顯靈機重發神證緣感昭灼遂用騰啓君王智境
邈羣法忍超絕邁優填之至心踰波斯之建善淦瑞言
於羣聖膺福履於大覺倍增懇到會益喜捨乃開藏寫
貝傾邸散金裝嚴法身誓取妙極以定林止寺祐律師

德熾釋門名蓋淨衆虛心弘道忘已濟物加以貞鑒特
達研慮精深乃延請東行憑委經始爰至啓敕專任像
事律師應法若流宣化如陽揚舲浙水馳錫禹山於是
捫虛梯漢構立棧道狀奇肱之飛車類仙腹之懸閣高
張圖範冠彩虹蜺榷鑿響於霞上剖石灑乎雲表命世
之壯觀曠代之鴻作也初護公所鑄失在浮淺乃鑿入
五丈改造頂髻事雖因舊功實創新及巖窟既通律師
重履方精成像軀妙量尺度時寺僧慧逞夢黑衣大神

翼從風雨立於龕前商畧分數是夜將旦大風果起拔
木十圍壓壞匠屋師役數十安寢無傷比及詰朝而律
師已至靈應之奇類皆如此既而謀猷四八之相對酌
八十之好雖羅漢之三觀兜率梵摩之再覘法身無以
加也尋巖壁縝密表裏一體同影岫之縹章均帝石之
馳色內無寸隙外靡纖瑕雕刻右掌忽然橫絕改斷下
分始合折中方知自斷之異神匠所裁也及身相克成
瑩拭已定當于萬字信宿隆起色似飛丹圓如植壁感

通之妙孰可思議天工人巧幽顯符合故光啓寶儀發
揮勝相磨礪之術既極繪事之藝方騁棄俗圖於史皇
追法畫於波塞青腹與丹砂競彩白塗共紫銑爭耀從
容滿月之色赫弈聚日之輝至於頂禮仰虔罄折肅望
如須彌之臨大海梵宮之跣上天說法視笑似不違於
咫尺動地放光若將發於俄頃可使曼陀逆風而獻芬
旃檀隨雲而散馥梵王四鵠徘徊而不去帝釋千馬躑
躑而忘歸矣初隱嶽未開野絕人逕及光公馴虎時方

雨雪導跡污塗始通西路又東巖盤鬱千里聯嶂有石
牛屈止至自始豐因其蹄沔遂啓東道尋石牛通嶮不
資蜀丁之力文虎標徑無待為人之威豈四天驅道為
像拓境者歟以大梁天監十有二年歲次鶉尾二月十
二日開鑿爰始到十有五年龍集浹灘三月十五日粧
畫云畢像身坐高五丈若立形足至頂十丈圓光四丈
座輪一丈五尺從地隨龕光燄通高十丈自涅槃已後
一百餘年摩竭提國始製石像阿育輪王善容羅漢檢

其所造各止丈六鴻姿巨相興我皇時自非君王願力
之至如來道應之深豈能成不世之寶建無等之業哉
竊惟慈氏鼎來拯斯忍刹惟我聖運福慧相符固知翅
城合契於今晨龍華匪隔於來世四藏寶奇可躋足而
蹴三會甘露可洗心而待睿王妙慶現聖果於極樂十
方翻動蒙法緣而等度矣思柱石於天梯想靈碑於地
塔樹茲紺碣銘為勝幢金剛既其比堅鐵圍可與共久
式奉偈讚仍作頌曰

法身靡二 覺號惟億 百非絕名 萬行焉測 羣
萌殊感 聖應分極 釋尊隱化 慈氏現力 叟哉
住緣 邈矣來際 求名受別 無垢立誓 凝神寂
天 降胎忍世 七穫厥田 八萬伊歲 夷荆沈礫
飛花散寶 夜燎明珠 曉漩翠草 一音闡法

三會入道 府豈虛植 緣固人造 曰梁啓聖 皇
實世雄 紺殿等化 赤澤均風 慈徧羣有 智周
太空 攝取嚴淨 匡飾域中 英英哲王 德昭珪

辟樂善以居 禮仁是宅 慧動真應 福交瑞跡
儀彼旃檀 像茲寶石 五仞其廣 百尺其袤
金顏日輝 紺螺雲覆 頻果欲言 鶯網將授 調
御誰遠 即心可觀 耆閣五峯 茲岳四嶺 綠篠
織煙 朱桂鏤影 泉來石嘯 風去巖淨 梵釋爰
集 龍神載騁 至因已樹 上果方凝 妙志何取
總駕大乘 願若有質 虛空弗勝 剎塵斯仰
邈劫永承

桐柏山金庭館碑銘

沈約

天生靈為貴有識斯全道天云及終天莫返故仙學之
秘上聖攸尊啓玉笈之幽文貽金壇之妙訣駐景濛谷
還光上枝吐吸煙霞變練丹液出沒無方升降自己下
栖洞室上賓羣帝覩靈岳之驟啓見滄波之屢竭望玄
州而駿驅指蓬山而永驚芝蓋三重駕螭龍之蜿蜒雲
車萬乘載旂旆之逶迤此蓋棲靈五岳未暨夫三清者
也若夫上玄奧遠言象斯絕金簡玉字之書玄霜絳雪

之寶俗士所不能窺學徒不敢輕慕且禁誓嚴重志業
艱劬自非天稟上才未易可擬自惟凡劣識鑒鮮方徒
挹出俗之願而無致遠之力早尚幽栖屏棄情累留愛
巖壑託分魚鳥塗愈遠而靡倦年雖老而不衰高宗明
皇帝以上聖之德結宗玄之念忘其菲薄曲賜提引末
自夏汭固乞還山權憩汝南縣境固非息心之地聖主
纘歷復蒙繫維永泰元年方遂初願遂遠出天台定居
茲嶺所憩之山實惟桐柏實靈聖之下都五縣之餘地

仰出星河上參倒景高崖萬沓邃澗千迴因高建壇憑
岩考室飭降神之宇置朝禮之地桐柏所在殿號金庭
事曷靈圖因以名館聖上曲降幽情留信彌密置道士
十人用祈嘉祉越以不才首膺斯任永棄人羣竄景窮
麓結懇志於玄都望霄客於雲路仰宣國靈介茲景福
延吉祥於清廟納萬壽於神躬又願道無不懷澤無不
至幽荒屈膝戎貊稽顙息鼓輟烽守在海外因此自勉
兼遂微誠日夕勤劬自強不已翹心屬念晚卧晨興食

正陽於停午念孔神於中夜將三芝而佇延飛九丹而
宴息乘鳧輕舉留鳥忘歸以茲丹款表之玄極無曰在
上日鑒非遠銘石靈館以旌厥心其辭曰

道無不在若存若亡於惟上學理妙羣方用之日損言
則非常儵焉靈化羽變蜺裳九重堯光三山璀璨日為
車馬芝成宮觀虹旌拂月龍輶漸漢萬春方為千齡始
旦伊余菲薄竊慕隱淪尋師請道結友問津東探震澤
西遊漢濱依稀靈眷髣髴幽人帝明紹歷惟皇纂位屬

心鼎湖脫屣神器降命凡底仰祈靈祕瞻彼高山興言
覆簣啓基桐柏厥號金庭喬峰迴峭壁漢分星臨雲置
壇駕岳開櫺磎塗塞產林圻葱青誰謂應遠神道微密
慶集宮闈祥流罕畢其久如地其恒如日壽同南山與
天無卒更生變練外示無功少君飛轉密與神通因資
假力輕舉騰空庶憑嘉誘永濟微躬

禹穴碑 鄭魴

惟帝世聖時必有符命在昔黃帝始受河圖而定王錄

交戲得神著而垂皇策堯配璇璣玉衡以齊七政舜繼
成六德文王獲赤雀丹書而演道定謨予亦以為禹探魑
穴得開世之符而成厥水功夫神人合謀而行變化天
地定位陰陽潛交五行迭王斗建司節岳尊山而瀆長
川乃至日星雷風禎祥祕奧三綱五紀萬樂百禮人人
物物各由厥生無非玄功冥持至數脗合以及之者王
者奉天而行故聖神焉帝皇焉彼令如仲尼有德而無
應故位止於旅人福弗及於生靈乃歎曰鳳鳥不至河

不出圖吾已矣夫然後知元命者軒告命者羲受命者
曰唐與虞成命者禹備命者文仲尼不受命乃假人事
而言故有宗子之說後代無作焉立言者壹仁義以求
世教瞽瞍蚩蚩使絕其非望法業之外存而不論予讀
夏書無是說司馬子長自叙始云登會稽探禹穴不然
萬禩何傳焉惑矣蒼山之瀝呀如淵如陵徙谷遷此中
不騫雨洗煙空屹然莫窮噫實禹跡之所始終唐興二
百八祀寶曆庚午秋九月予從事于是鄉感上聖遺軌

而學者無述作禹穴碑庶察使舊相河南公見而銘之

銘
元稹

禹穴宜載夏與秦胡為而不載

禹貢無說秦始皇游會稽李斯刻石亦不言

古而不載遷與鄭胡為而載

始司馬遷自叙探禹穴而後千百年無說至鄭乃制

此子以為天德統萬止言其蓋

言其蓋萬物以生非談天氏所謂蓋天者也

地德統萬止言其載

言其載萬物以生也

堯德統萬止言其大

川萬山皆禹之會

讀為會符

一穴

禹穴藏五符統而言之故曰一

不足

為最故夏與秦俱不之載而人以之昧雖山之堅雖洞

之藏有時而堙有時而允歲其萬千風雨濤汰亡其嵌
呀叢是蔚蒼曾鄭與遷斯碑斯載時斯時之賴

書戒珠寺

趙璘直

浙東觀察治勾踐故城其東北三里有山曰戴戴蔬類
也傳云昔越君所嗜常採於此遂用名之在晉為王逸
少別址尚留故池與祠堂又云陳大建初有天竺徒聽
門踰顛辯博神異及死葬山上其形數見後夢語其門
人曰必為臥像屋之壓我則不見為之果如言而所構

華壯敞絮甲於郛內所謂昌安寺者其後二百七十餘年學人懷表猶病正位未廣繕治益嚴又十年值會昌廢毀之數獻文皇帝君天下大中初復許郡府置寺宇而越州得其五昌安在詔中六年六月又別以戒珠為名觀察使尚書李公褒實司其事當是時其徒多罷去或不任事而懷表復顓其勞今則崇構真就矣學者或去或沒獨懷表齒且耄精恪如初可歡乎余長慶中始冠將為進士生寓此肄業時懷表已名字衆人中及

開成繕治始休工余以前讎校祕書遊越與懷表復相遇
勸余為記逮今二十二換四時矣中間遭罹丘墟又重樹
立於人事悲歡不可遽數循分累寸奇塞塵寰晚守江嶺
強號顯達而表公不離繩榻幾覩廢興雪頂絲眉始終一
趣可謂行充於內而福持於外者矣余既詳其本末思有
以傳於綿長客有前藤州刺史駱巽與聞之喜曰某戢山
之下寄居人也且與表公遊甚久歸願買石以刻遂筆以授
之咸通三年正月二十五日中大

夫守衢州刺史趙璘直書

大龍泉寺碑并序 虞世南

昔軒轅之臺表於大荒之野靈光之殿存乎曲阜之鄉
然皆起滅不停苦空無我遺風餘跡尚或可觀况佛刹
淨居金剛福地百靈之所翊衛萬善之所扶持宜其踰
億劫以永存歷三災而彌固者也龍泉寺者晉咸康二
年縣民王湯及虞弘實等之所建立二人以宿植之良
因修未來之勝果爰捨淨財興新福事雖宏壯未極而

嚴淨有餘其地勢則憑峻嶺以為墉縈長江其如帶乃
於形勝之所式建方墳背巘面流亭然孤立譬羣峰之
望洊澤若圓嶠之汎滄溟棲真之致莫與為儔道場之
建于茲二百年矣值梁室板蕩大盜潛移四海沸騰九
夷交亂其壯騎之所憑陵戎馬之所躡轡燎原薙草邑
無遺噍玉堂金穴餘構莫存甲第高門尺椽皆盡浙河
之左尤鍾其弊于時禹川殷阜舉袂成帷雲棟繡連雕
甍綺閣皆夷漫滌蕩萬不一存潤屋為墟曝骸如莽家

靡餘爨路無行跡唯此伽藍疑焉不動清梵夜響和鈴
旦揚行人宴嘿風塵無警或有履鋒介士彎弧劍客莫
不釋戈免胄望崖頂禮豈非慈善幽贊功德冥符能伏
獯戎善和怨敵斯固三寶之力不可思議但自創立以
來多歷年所時經理亂道或污隆冬室夏堂亟多頽毀
禪思或擾分衛罕周乃有清信士女若干人咸撤布帛
隨時喜捨步影捷跹資待無缺有仁祠焉有淨衆焉籍
四部之護持起十方之迴向低頭合掌並趨菩提彈指

散花皆成妙道然佛法難逢人身易失傳火交謝念念
不留閼水成川滔滔莫反寧可宴安巢幕甘寢積薪沈
溺蓋纏不求解脫實宜出愛網同護法城修福不捐至
誠必感大悲汲引義非虛說庶憑願力俱證道場是用
鏤之金石咸題姓字貽諸不朽乃作銘曰

正教既隱 像法斯備 栴苑祇林 香城金塋 烏
跂連屬 鷄飛相次 像設間安 斯為佛事 乃建
靈塔 徠江之永 棟宇既修 雕龕斯整 負岩面

壑棲雲倒景 澹爾智流 疑焉仁靖 方丈淨室
四柱寶臺 運遷時謝 日往月來 桂棟或朽
蘭橈將摧 珠幡掩色 寶網凝埃 篤矣清信 共
弘利益 或捨衣裘 咸傾粟帛 造新葺故 呈材
獻石 坐擬金繩 供同香積 世諦虛假 色相非
真 棲託嘉樹 迴環苦輪 唯我淨域 出要良津
勝業可久 暉光日新

秦望山法華寺碑序

李邕

昔者法王道開堀山相現曾是大事職非小緣順喻孔
多證入彌遠故以三界為宅五濁為火四生為子六度
為門一乘為大車十方為長者轉置熱惱之衆延集清
涼之都念茲在茲廣矣大矣法華者晉義熙十二年釋
曇翼法師之所建也師初依廬山遠公後詣關中羅什
深入禪慧尤邃佛乘雖禮數摳衣而名稱分坐與沙門
曇學俱遊會稽觀秦望西北山其峯五蓮其溪雙帶氣
象靈勝林壑虛閒比興耆閣營卜蘭若羞涅槃食納如

來衣專積法華永言寶意感普賢菩薩為下俚優婆提
狔子於竹筐寄釋種於蓬室師以縮屋未可枕屐乃明
移出樹間延入舍下及杲日初上相光忽臨乘六牙衛
八部勝幡虹引妙樂天迎瑞相騰雲遙裔上漢師想望
太息沈吟永懷葉公好龍已遇真物羅漢測佛未了聖
心於是苦行自身炯誠通夢宛如昔見彌恨前非象勸
持經嘗難其語夾夾聽法不易其人矧乃攝以蜂王吼
以師子禮謁者倚其裳袂讚歎者合其風雷時太守孟

顛以狀奏聞以為寺則知妙法者真如之正體蓮華者
淨道之假名是故崇厥經署於榜入無量義成不住因
至若高僧慧基邑人陳載皆踵武扳跡傳燈襲明或五
柱範堂或七寶規殿立普賢座追連弗藍龍王讓池雁
子疏塔迦羅衛國連至雲山淨明德宮更開日月固足
以發慧印啓玄門入位畢臻出家偕應則有持證等觀
永藏同流或慧舉十徵或昭明再造或簡丈瑞像或武
帝香鑪寶鈴吟風珠幡交露僧瑤墨意畫長豪之妙光

宮女綰功織大身之變相次有陳隋國施州邑吏桓百
寶盈於九偶羣經備於三藏所以神鍾警夜保賢聖之
天居祥鳥肅賓迂軒蓋之雲集恣辱靈草招萋萋於
小莖優曇異花蹇灼灼於喬榦故得人天迴首江海因
聲芭蕉遇雷倏焉滋茂葵藿隨日至矣勤誠登山而野
曠心空浴水而垢除意淨施及先律師道岸今弟子釋
儼並身林久伐禪刺都遣性通七事戒摠八關金杖五
分優劣既等繒綵四道功德豈殊甘露有加香油不墜

頃者豪州刺史前此邦別乘太原王公名弼法海廣大
慧炬融明德立於夜義開於物邛惇致主之節有耿扳
竿葛亮報國之誠不忘草奏夫人武氏佩服真空千櫓
正櫓正覺及男緬緒等惟肖二尊克慎三業若行若坐
依佛依僧去煩惱之外糠得慈悲之內實起普賢臺之
級寫法華經千部廣化人吏大啓津途即普賢臺立法
華社每年二月重會一時且地効其靈山呈其秀有上
座正覺寺主道解都維那神慧僧表道賓律師行深慧

燈集衆材為林衆器成樂一體和合互用住持相與王
公曰夫名者事之華碑者物之表其或表不立則瞻仰
失容名不興則讚述無地願言刻石是用齊山朝散夫
夫前侍御史今都府戶曹袁公名楚客其皎如日其心
如丹負兼濟之雄才託演成之雅意顧慙作者徒使惜
然其辭曰

會稽南山 秦望北寺 高僧往還 聖跡標奇者
閣北峯 法華取義 羣公護持 歷國檀施 陸寶

大來海珍總萃 幡影連珠 像光發瑞 臺壓龍
首殿開鳥翅 象駕菩薩 烏迎車騎 異香馥
神鍾髮鬚 松巘蕭疎 竹澗葱翠 網紀有條
禪律不墜 掾曹正直 別乘仁智 作為碑版 讚
述名字



會稽掇英總集卷十六

欽定四庫全書

集部

會稽掇英總集卷十八

詳校官中書_臣張經田

助教_臣常循覆勘

總校官庶吉士_臣倉聖脉

校對官中書_臣田尹衡

謄錄監生_臣張鈞

欽定四庫全書

會稽掇英摠集卷十七

宋 孔延之 撰

王右軍祠堂碑

王師乾

公諱羲之字逸少琅邪臨沂人也原夫在天呈象箕昂
垂其宿在地成物嶽瀆曜其英蘊粹含精孕靈誕秘降
為人傑君酌其休自黃龍紀德帝軒握大寶之符丹鳥
啟瑞周儲開氏姓之兆爾其吉駿誠感標秀質於文昌

離翦止殺協英圖於武帳既而呂刀慶遠郭筮靈長或
瀏瀏風松或爛爛巖電盛哉茂族其昭昭乎繫德象賢
為海內之冠冕國史家牒可略言焉曾祖覽清河太守
宗正卿光祿大夫即丘子劉德智畧始參宗正蔡義經
術初登大夫故得象海括河昇高能賦祖正散騎常侍
父曠建威將軍淮南內史建始侯應德璉之規獻入掌
禁中韓安國之嚴明才兼閭外公之生也踐得二之機
應五百之慶骨鯁清貴鑑裁端凝夷簡澹雅魁梧頽放

性教如也深為從伯大將軍敦丞相導之所器重學摠
墳素藝苞流畧書窮八體才膽五能至若垂露崩雲芝
英薤葉鸞迴鵲顧之巧虎踞龍騰之勢信可挺拔終古
輝映來今者乎我大唐太宗文武聖皇帝甄陶堯舜漂
滌羲軒物色賢良夢寐前載萬幾之暇宏覽典墳得之
右軍欣然師範親紆聖旨製讚論焉其畧曰詳察古今
研精篆素盡善盡美其唯王右軍乎心慕手追此人而
已斯乃萬代之榮觀也與夫周表商閭漢修樂墓故不

同年而語矣時太尉郝鑒負佐命之勲居台鉉之貴使
求佳壻于文獻公公令東廂自觀之子侄聞者莫不聳
身矜持公獨坦腹而不屑意竟當選矣起家秘書郎石
渠與府天祿仙臺遂非揚雄劉向之才華班固左思之
覃思筆削之舉不亦難乎征西庾亮請為參軍累遷長
史參豫謀謨揔統綱紀魏陽元之領袖早歷清階溫太
真之鮮明遽登英位兼此二美在我公焉遷寧遠將軍
江州刺史滙澤西浮潯陽重鎮伊昔南夏埒擬扶風江

湖沼施承廬鬼窟所以山藪藏疾川澤納汚非無草竊
之人實有萑苻之盜下車無何臬音遽革公譽望幼挺
才器夙彰聲名洋溢公卿藉甚識與不識莫不引領而
思交知與不知咸願舉手而同薦頓召為侍中吏部尚
書皆不應命常伯補袞冢宰提衡唐虞則龍作納言漢
魏則貂蟬近侍卒不降志保真恬怡荀卿所謂德行高
則驕富貴禮義重則輕王公於右軍見之矣復授護軍
將軍亦推遷不拜除右軍將軍會稽內史甌越輿區地

惟闕輔浙河襟帶秦嶺股肱士女殷繁商旅聯榻一都
之會氓俗難循公示以威恩孚以誠惠敦學校勸農桑
臬雄猶賞廉孝未踰朞月風化大行然後致書朝端以
誠執事詞理鯁亮言旨切直豈徒賈生流涕孟軻浩然
而已哉既而金行不競小人道長興言慷慨誓墳塋
隨時卷舒闕國隆替即不屑之願徇長往之誠窮遊名
山徧歷滄海捐龜組褫龍章練金膏屑瓊藥濬曲水茂
蘭亭開禮賢之館引貞肥之客於是謝安孫綽李統許

詢支遁許邁之儔若非陶首謝時即是文章冠代何嘗
不攀勝慕德夕處朝遊公自為之序以申其志也竟以
樂死遂其初情春秋五十有九卒于會稽之里第朝野
軫慟郡縣傷嗟路泣行號風悲日慘豈徒春者不相工
女輟機而已哉追贈金紫光祿大夫諸子仰遵先旨固
讓不受公有濟天下之心蘊公輔之量智度淹曠規模
宏遠抱劉琨之氣嗟地狹而不容懷樂毅之才歎主昏
而弗用有以知晉室之不延也夫盛德之祀綿于百代

公侯之胄必復其先自晉迄陳統會稽時殆逾數十可
謂英英門戶矣既而黃旗霸盡紫蓋英衰衣冠咸返帝
鄉禮樂並歸宸甸子孫流落今為居人十二代孫庭之
祐之惓惓善人高尚其事貞不絕俗隱不違親偃仰琴
書逍遙魚鳥雖心懷追遠之道而家迫屢空之恨遂使
烝嘗久曠享德無依樂毅之後未封若敖之魂遂餒師
乾幸因承乏叨佐越藩仰休烈而延聳俯遺塵而景慕
敬聚宗族隆構清祠靈宇森邃脩廊輾轉時思之裡再

茂如在之敬踰明筌譬葯房曄晨風而轉翠蕙簡蘭藉
順四序而流馨北望戢巖題扇之風更遠東連竹徑養
鷺之沼彌清西接邑居朱城麗日南通阡陌翠柳含烟
加以萬壑爭流千巖競秀澄湖湛鏡漬星象於波瀾洞
穴封金孕靈符於宛委信允常之勝境勾踐之名都焉
從十一代孫正議大夫守越州都督上柱國公士希俊
師乾八從兄也操行端舉風神朗邁汪汪焉人不能測
凜凜然更不敢犯愛人如父母摘伏若神明春露流滋

廡庶銘其巨惠秋霜泛簡豪猾肅其嚴威遊刃有餘雍容多暇乃昌言曰陸機文字猶陳祖德潘岳詞賦先述家風況我族盛門昌首出天下爰自著姓以迄于今莫不儀表三台抑揚二鉉英賢濬發才產光揚苟無述焉寧昭勲績恭承嘉命敢不云乎師乾學非覩古文慙秀異聊申舉一詎述芳猷敬疏無愧之詞庶披文以見質公有七子並有重名晉史詳矣或早終絕嗣或無子國除其有子孫蟬聯以暨今日者其唯黃門乎可以配享

祖宗列為昭穆矣又諸與公交遊者英貴特達勲績昭著獨謝太傅乎今配食賓筵矣從十四代孫石城寺僧道敬金庭觀道士道崇研空兩諦覈妙重玄入龍藏而冥搜遊鳳京而蹟秘從十四代孫朝議郎行歙州黟縣令爽銅章撫俗墨綬親人惠訓浹於重泉謳謠光乎單父從十六代孫玄慶令嗣賢文毒師玄保家等並晦迹林泉脫屣纓冕追仲長之逸軌慕郭舉之高蹤共扇家風同宣祖德殫素產頌洪猷勒琬琰於東甌俾庶幾于

南峴其辭曰沂波拈地緱嶺干天代載雄傑奕葉英賢
三槐繼軌九棘蟬聯盛哉茂族人無間然秦則離翦漢
惟吉駿武帳揚暉文昌挺韻象賢踵德誕生英俊汪汪
萬頃森森千仞常伯獻替納言喉舌僉曰具瞻是屬明
哲竟不降志朗其不屑霜氣稜稜風威切切匯澤西楚
稽岫東甌人稱險隘俗號輕浮威而不猛善而能柔獄
囚靡滯庭事無留有道則仕無道則亡關國隆替與時
行藏屑瓊膏銑晦景韜光山川益秀草樹增芳我唐太

宗兮皇王冠文經天地兮武戡亂欽墨妙兮右軍發睿
詞兮制幽讚敏兮叨紀綱佐郡未理兮泛沂康欽族祖
之休烈峻祠宇兮載巖陽明德惟馨兮茂烝嘗子孫不
知其所以遂刊石而傳芳

漢高士嚴君釣臺碑

梁肅

先生諱光字子陵會稽餘姚人也名聞于漢光武之世
東觀書實載其事當哀平之後天地既閉先生韜其光
隱而不見建武反正雲雷既定先生全其道而不屈消

息治亂之際卷舒夷曠之域如雲出于山游於天復歸于無間不可得而累也則激清風聳高節以遺後世先生之道可見于是矣或曰人倫大統莫大乎君臣崇德致用莫盛乎富貴而子陵以賤為貴以臣傲君二者其失於教與君子曰不然夫賢哲之道一動一靜動而用者功濟乎當世靜而不用者化光于無窮故許由于堯先生于漢皆不易乎世游方之外俾後之人聞清風而嚮慕焉蓋運有會事有行伊呂遇湯武而立大功子陵

遇世祖而立大名去就不同同歸乎道焉歲在大梁予
涉江自富春而南訪先生遺塵則釣臺尚存仰聆德風
刻頌于石其文曰

李葉浩浩

澆風蕩渾

先生括囊

鳥獸同羣

四海既平

故人為君

富貴於我

有如浮雲

召至禁中

告歸江濱

下視天子

上動星文

接輿肆狂

孤竹求仁

介推山死

龔勝蘭焚

猗歟先生

異乎斯人

俯仰世道

從容屈伸

清谿悠悠

白石磷磷

遺風是仰

終古不泯

開元寺律和尚塔碑銘

并序

釋氏先律師諱曇一字曇脩報年八十僧夏六十一以大歷六年十二月七日滅度于越州開元寺遷坐起塔于秦望山之陽制緣會葬者以千百數大師本南陽張氏曾祖隋太常恒始家會稽之山陰大師誕鍾粹氣聰

悟風發幼學五經因探禹穴至雲門寺遂依沙門諒公
出家景龍中剃度尋受具戒天縱辯慧益之以軌儀翕
然已為人望矣開元初西遊長安觀音亮律師見而奇
之授以毗尼之學又依崇聖寺檀子法師學俱舍唯識
從即度沙門善無畏受菩薩戒深道觀奧出類拔萃晷
月之間名動京師大師崖岸峻峙機神坦邁體識詳雅
應用虛明得三藏之隱蹟究諸宗之源底加以素解玄
儒旁摠歷緯長老聞風而悅服公卿下榻以賓禮由是

與少保充國陸公象先賀賓客知章李北海邕徐中書
安貞楮諫議庭誨及涇縣令萬齊融為儒釋之遊莫逆
之友其導世皆先之以文行弘之以戒定入蘭室而馨
香自發臨水鏡而豪髮必鑒不知其所由然矣開元二
十六年復歸會稽謂人曰三世佛法戒為根本本之不
修道遠乎哉故設教以尸羅為主取鄴郡律疏合終南
事抄括其異同詳發正義學徒賴焉大凡北際河朔南
越荆閩四分之宗自我而盛烈炬之破昏羣流之赴

淵澤適來之時化行也如彼有為而生乘化而息草木
潛潤慈雲無心適去之時處順也如此人世遷轉道存
運在瞻望不見寂寥空山哀哉銘曰

越水漫漫崇山迴合大師化滅式建靈塔緬慕上士誕
修淨法有威有儀不穿不雜德溥化洽雲從海納勒碑
垂後千萬億劫

大夫種銘

并序

李觀

嗚呼種知吳之可以取知越之可以強而不知身之進

退存亡沈吟躊躇以至于非辜哀哉斯由淳德離披衰
世難維故獨正者不得以鎮邪獨信者不足以塞疑夫
周公孔子聖人也尚有彼婦之歌鷓鴣之詩矧乎其下
之人乎然齊桓公終任夷吾晉文公不疑五臣數子者
竟能挈五霸之器加二君之身臣無所反側君無所短
長下冠列國上尊時王惟齊晉之區區行何道而臻斯
之偉歟殆非二君能推心于數子俾數子得不失夫進
退存亡者乎使夫句踐既舉全吳乃授霸圖建國之權

付種之能必將合諸侯而朝中原提封吳越之邦接跡
桓文之勲則句踐為霸君種為霸臣必矣何尚乎浮洞
庭去故國為天下之旅人哉嘗用種之謀若有之思越
人之力尚剋之苟天不永越年越亦不愛種賢越不能
卹其肩種是以誅其身噫范生之書未釋于手越王之
劍已承其咽哀哉且會稽之羞非越能復惟大夫之復
大夫之死非長頸背義亦大夫之非智哀哉詢種之名
不登于三仁求種之墳不在于九原勒銘以備脫簡終

古以慰枉魂銘曰

越山蔣蔣吳江淝淝會稽之圍姑蘇之讎敵國既亡大
夫何哉不知其去空知其來子胥至忠不信於吳鵠夷
知機浩然乘桴君胡役役謀國遺軀或曰不然吉凶相
實不有覆車孰懲為臣不有泛舟孰為濟人道無全功
用有屈伸冥然陳力得於開卷神能感我彷彿如面往
者之悔來者之憲志于玄石將懋將言

唐通和先生祖君墓誌銘

許鼎

先生諱貫字子元范陽人曾祖濟蜀州司馬祖計掌膳
郎父斌守真不仕先生性寬平家人州里莫得見其喜
怒長短頗覽書傳尤工詩句天才器識少有倫侶益修
黃老之術初賀監知章得攝生之妙近數百年不死負
笈賣藥如韓康伯近于台州上升徧于人聽元和己亥
年先生遇之謂先生曰子寬中而柔外可語以至道也
僊家品級如青紫基級不可驟致必以退節為首退節
則寡欲寡欲則神逸神逸則無為無不為也反此而求

道猶却走以追奔也子其志之後遇今歲遇爾于小有也乃授斷穀丹經先生盟而受之吞一粟則十年不飢門人得之皆符經訣于是先生道譽喧動公卿耳目求見就謁凡累十人丁酉年鄂侯楊公為華牧張公乞丹於先生先生曰學道先乎養神然後吞藥藥吏也神君也君逸于上吏勞于下以勞助逸是謂萬畢貫將吞丹也坐忘所思行忘所之却視其身蕭寥希夷所以絕穀十年不飢今張公萬乘柱石百姓父母一物失所必軫

於懷欲無勞神其可得乎雖九轉還丹亦無補也公曰
其言至矣己亥年秋九月先生召門人聶姪曰二儀者
萬有之逆旅兩曜者百靈之燈燭欲燈燭之不曉安逆
旅之不去怪矣况賀公之期至矣乃就沐浴如有所候
粵八日奄然委化壽九十有五先生夫人胡氏蚤死無
嗣一女適張審言無男一女適黃虞卿雖別族姓皆得
鳳毛伏覽經法養志丘園聲華藉甚則曰先生無愧矣
始刻石子聶與表姪孫謝隲門弟子閔仲孚等議曰昔

妻諡其夫曰康至今躋之二三子得不以黔妻為式
乎我先生聽於無聲視于無形不曰通乎言不訟物之
短心不繫時之非不曰和乎謹號通和先生以彰先生
之德也何如僉曰俞遂刻號于石其年冬十一月十一
日葬于宅東北隅附胡夫人墳右世禮也鼎亦先生所
教者奉門人聶姪命為墳表銘曰

北西山南東湖水為陵山為滂先生名字終不誣

祖先生墓誌序

徐鉉

門生彭汭江夏人既登第還鄉明年補本郡司倉掾嘗
豫社祭宿齋于郡之延慶院獨處一室既寢而精爽不
寧展轉至四更乃得寐夢一白衣書生入戶謂汭曰某
嘗述少文詞在此室中司倉常見之邪汭辭以未見書
生曰試為讀之言訖而去及寤猶四更也因呼僕秉燭
周視牆壁間意有留題者而都無所見唯戶扇下有石
方尺有咫泥土覆之就視彷彿有賀監字乃知此是也
祀事既罷命移置階前以水滌之文字依然即進士許

鼎所纂祖先生墓銘也問其人云十年前院側數十步
官置瓦窰掘地得之掌役者軍吏也不能周知但見其
有文因惜不毀而置于是案賀監以天寶二年始得還
鄉既而天下多事遂與世絕至于吳越故老亦不能知
其所終微彭子之夢則賀監輕舉之跡與祖君高尚之
節皆埋沒矣夫史臣不書神仙之事先聖亦不以此為
教然其清心鍊氣全神保精冥然與天地合德聖人出
於自然賢人可以積習老氏之玄旨不可誣也真靈之

意欲使殆庶之士自強不息故必存不朽之迹以示於世此許生所以見夢也彭子性恬淡寡辭安貧好學故能自奮于白屋之下而神交于古人亦可尚也愚甚竒其事因為之序

仲淹自丹陽移領會稽郡行之日過邵疏逸人溪齋因話照湖事逸人曰客有自江夏寄唐人許鼎所撰祖先生墓誌頗言賀監之異出而示之辭精理遠徐常侍鉉為之別序既抵郡訪天長觀即賀公之舊居也款其真

堂卑陋已甚乃命工度材而新之又刻徐公所序之文以廣遊人之觀採焉尚書吏部員外郎知越州軍州事范仲淹述康定元年三月二十日立

法華寺戒壇院碑

萬齊融

或曰佛法東度律教南流而云尸羅波羅蜜者何華言持戒清淨般若波羅蜜者何華言智慧明了故戒為德本萬善以之為生地慧為勝業百福由之以出天聖人以此而修身防非止惡上士以此而度物勸善行慈持

之而迷倒是生虛空不可以十指執捉學之而住著為遠
日月不可以兩手捫摸信矣二法之難見也如是其有
不教而自得天然而自知持象扇而掌數明珠據龜狀
而心照清鏡則我玄儼律師其人也律師俗姓徐氏晉
室南遷因官諸暨遂為縣族年始十二辭親從師事富
春暉澄紹聖元年恩制度人始墮僧數隸懸溜寺律師
幼而明敏長而韶令標格峻整風儀凜然迨于弱冠乃
從光州諮受具戒後乃遊詣上京探蹟律範遇崇福意

律師及融濟律師皆名匠十方南山上足咸能昇堂睹
隲其所印可由是道尊戒品名動京師安國受記並充
太德後還江左徧弘四分因著輔篇記十卷羯磨述章
三篇至今僧徒遠近傳寫初光州岸公嘗因假寐忽夢
神僧謂曰玄儼當為法器云何教以小乘後乃命弘般
若由是研精覃思採摭舊學撰金剛義疏七卷古德所
不解先達所未詳咸皆發揮光明若指諸掌誓以一生
宜講百徧越邑精舍時稱法華晉沙門曇翼曾結菴曾

巔入是法三昧感徧吉菩薩徒觀其塔類多寶涌出以
證經宮如轉輪飛行而聽法雙鳥所以示兆今尚翔鳴
六象所以呈奇時猶隱現不可得而思議者蓋斯之謂
歟信如來之福庭是菩薩之隱岳大師乃考槃是卜束
鉢深棲建置戒壇招集律行若夫秦衡上士燕代高僧
數若稻麻算同竹葦伏膺請益躡屣擔簦宴坐不出幾
三十載開元二十四年我開元天地大寶聖文神武證
道孝德皇帝持法鏡握神珠親注金剛般若經詔頒天

下普令宣誦都督河南元彥冲躬請律師重光聖日律師闡揚幽讚允合天心令盲者見日月之光聾者聞雷霆之響師之演暢蓋有力焉夫樂小法者迷自我而為病通大方者惜開空之法道若會夫三歸一觸理冥事自優波羅已下猶或病諸而律師綱紀小乘演暢大法晤佛境之非有識魔界之為空故能使涅槃將生死一如煩惱與菩薩齊致發心而登佛地非我而誰白黑歸依當仁不讓昔僧護法師常居石城宴坐青壁仰其中

峯如有佛像願造十丈以圖兜率良願未諧護公長逝
梁武皇帝詔僧祐律師馳傳經理規模刻劃意匠纔施
俄而山冢萃崩全身坐現合一百五十尺雖金石絲竹
四天之供施常聞而功德莊嚴十地之鏤鐫尚闕律師
乃內傾衣鉢亦外率檀那布以黃金之色鎔以白銀之
相銅錫鉛錯球琳琅玕七寶由是渾成八珍于焉具足
雖寶積獻蓋界現三千迦葉貢衣金踰十萬如須彌之
現於大海若法日之出於高山此又律師之功德不可

思議者也故洺州刺史徐嶠之工部尚書徐安貞咸以宗族設道友之敬國子司業康希銑太子賓客賀知章朝散大夫杭州臨安縣令朱元春亦以鄉曲具法朋之禮開元二十六載恩制度人採訪使潤州刺史齊幹越府都督敬誠採訪使盧見義泗州刺史王弼無不停旟淨境稟承法訓齊公乃方舟結乘奉迎律師于丹陽餘杭吳興諸郡令新度諸僧躬受具戒自廣陵迄于信安地方千里緇黃道俗受法者殆出萬人凡禮佛名經一

百徧設無遮大會十筵而人境住持舉無與比夫秉法
傳授從佛口生有門人法華曇俊崇默龍興崇一開元
智符稱心崇義香嚴懷節寶林洪霈覺脣灌頂皆不傾
油鉢無漏浮囊經不云乎如旃檀林旃檀圍繞如師子
王師子圍繞信律師之威神有在而法主之功德不刊
嗚乎三界無訛百齡共盡此生已遺于後息他世應見
于前心天寶三載歲次壬午化緣已畢十一月三日現
疾於繩牀七日午時坐終于戒壇院春秋六十有八粵

其月二十五日寔于寺南秦山之下高樹雙塔光明踰
于白雲列植千松秀色羅于明月經始則神邕崇曉佳
持則惟湛道昭並躬護聖場親傳智印其餘二千門人
五百弟子承般若之深法受毗尼之密行盡號顓門無
待彌勒今並列載碑陰用標律序初律師凶問時余忝
外役永懷德音謂如昨日及瞻斯拱木已十有餘秋私
念生涯自憐何極庶依神理敢作銘云

律師堂堂宗高偃王才華骨貴戒美名香佛國柱石僧

門棟梁毗尼玉色般若金光我聞二法難信難解等有
開遮平無高下生生草繫節節支解念電不停身塵自
假觀生若幻視息猶風慧明日月戒性虛空不遠無相
修行在中善矣真匠賢哉法雄我生已盡梵行已立示
化衆生隨緣悟入去來三界無苦無集常行一乘日用
斯給哀哀釋子資父惟師痛失瞻仰悲深住持方墳永
翳圓塔長辭何時誦現更紹迦維

南鎮永興公祠堂碑

羊士諤

越部凡七郡三十有八邑提封所加旁合溟海由是崇
元侯之命建東征之府其鎮曰會稽山其神為永興公
國朝接周漢之統玄化大備禮茲百神受職祀典錫以
嘉號視為諸侯貞元九年夏四月連率安定皇甫公以
前月丁酉詔旨奉玄玉制幣禱于靈壇勤報公之享循
每歲之法致齋野次虔捧祝冊夜漏未盡禮成三獻君
子謂公能宣命以展敬故祀神而降祉克靖甌越大康
東南我修德刑以牧黔首神作雷雨用登有年明訓式

敷幽贊斯効觀夫高麓迴抱以蔽景大澤下浸而蒸雲
沈潛龍虎之姿泱泱風霆之氣靈衛交戟閤宮洞門神
其在焉寵被侯服是宜札瘥不生水旱罔沴允荅宸慮
長于衆山乃銘石孺垣以代彝器其辭曰

天秩喬岳奠茲南方精合晦明化滿柔剛帝念下土延
神致祥清廟既闢華袞有光乃卜元辰爰詔方伯爾克
精享神其昭格蘋薦惟誠金奏匪樂時臻大和人受景
福玄德孔鑒虔恭肅祇陳信不匱形乎正辭

吳越國武肅王廟碑銘

并序

皮光業

粵以唐長興七載壬辰春季冀凋十三莢天下兵馬都元帥尚父守尚書令吳越國王棄捐宮館以是歲明宗皇帝降太常博士段顥定謚議曰武肅詔尚書工部侍郎楊凝式撰神道碑文宣翰林待詔張季恭至吳越書于刊石後二年歲在敦牂天下兵馬元帥嗣吳越王建廟貌于始封之越國禮與境內樂之罔極孝思也蓋聞神道設教莫大於郊社嚴禋明德惟馨無逾于祖考孝享

是以百代相襲六籍盛稱報劬勞則天保是徵展欽若
則王假是訢靜況建除難靖亂之業揚武烈之威名振
剛德尅勅之風成肅恭之懿號陳力四紀光奉八朝生
為有土之君薨立象朝之廟足可睢盱召畢齷齪桓文
聲華永而日月齊簡冊徧而今古在矧夫堂成王構家
繼國肥歷璧寶以知來出玉林而嗣位高陽號里無媿
前賢夏屋登山常遵治命爰自鄭緇始襲晉墨未除不
忍一日之離遂立千年之祀金鎔陽邁已成像于吳城

香刻旃檀復祔神于越國恭惟先天下兵馬都元帥吳越國武肅王殷朝錢祖山萼分枝唐代鄴公靈源直派簪裾軒冕禮樂詩書疊慶連華交光奕葉應邵七世累爵重官羅企一門惟忠及孝其降神也虹飛蜀國始見殊祥魚躍汾河是生奇表赤光耀室黃氣浮空石龜隕下于官山胡人來歸于寶器

此二事安國縣父老言也

其英姿也鳳

文龍藻異出精神白琥蒼珪琢為標格加之薛璘整峻謝安風流俯仰可觀進退有度慕容德偃月日角光影

鑠人李子堅匿犀龜文威儀鎮俗其辭韻也音容洒落
智辯鏗輞元善抑揚張暢詳雅至若討論國計談劃兵
籌接對使乎撫御將下所謂五河奔注百谷崩騰玉虹
起而雲霧銷金虎嘯而風飈動揣摩勝負赫連勃口授
懷慙捍闔興亡蘇季子舌端有愧其氣度也志高建木
量等大瀛含垢匿瑕周知邊際求賢接士無怠寅昏重
仁義如丘山視玉帛如咳唾翹翹車乘唯在得人憧憧
往來皆種和氣所以臯皮豹舄鶴列犀渠咸願殺身用

酬大惠變家為國誠由萬化生身以德聚民所謂八風
從律其英雄也能知否泰善俟雲雷動必有成舉無遺
策蛟龍得雨莫測變通鵬鷃出林可知意度其間文武
迭用仁義不常平阿亡戟得矛並能取舍元纒搦蛇騎
虎不覺艱難奄有具區廓開霸業設使庾翼復出必不
忘譽於桓溫阮籍重生安敢輕言于廣武其文學也家
承儒範世尚素風侍絳紗帳于先生授白綸巾于神女
才通夢寐鳳是吐來志在典經龍鬬不顧所以博覽七

緯精究三玄盡得津涯皆升堂奧其于篇詠尤著工夫
思風起而繡段飄言泉洶而金沙見其札翰也花隨腕
下星逐毫飛靄若游雲細疑垂露鉤刀向背未饒索肉
芝筋點畫方圓高掩崔肥趙瘦就中濡染脾額益見呈
露鋒銑四方仰之神蹤一代稱之墨寶王逸少若見甘
避雁行蕭子雲如逢大慙蟬翼其建大功也唐季乾符
之末中和之初海鳬乍揚天鼉初伏塵飛野馬四郊之
壘漸多霧暗騰蛇五賊之機共構其始者王仙芝結纍

中土首構禍階雖已誅夷猶殘支黨自此聚林鳥合草澤蜂飛輕薄者固是披攘謹厚者亦為慄悍江南則朱直叛亂于唐山孫端冠孽于安吉西侵宛水東患苕谿郡縣則終日登陴生民則長時伏莽王時郊居葛圃嘉遜茅山

即葛仙公種瓜之地故曰葛圃與茅山相接在臨安縣城東二里

方當枕石漱

泉尚是褒衣博帶覩茲多事慨然究懷顧謂朋友曰丈夫當須撥亂平姦豈可懷安端坐是日乃奮戎服挂彼儒冠大散家財廣招勇士申令纔舉行伍肅然手仗義

旗身當勅敵一月之內二寇殄平靜千里之山川救兩
郡之冰炭是王之初立功也其次黃巢來從五嶺直下
三衢展梟翅則電布星羅張鯨牙則山連岳峙所遭蹂
踐並作塵灰王迺獨領偏師據于險地既逢大憝遂設
奇兵敵望草木叢林皆是戈矛旌幟獲敵人之言也我則左右
翼陣點化如神當下追奔尚賈餘勇長蛇封豕便出他
疆新市下江保安數邑是王之功也其次彭城劉漢宏
據南鎮之重地守東越之名區黃巢既犯兩京僖皇乃

巡二蜀漢宏不思奔問便廢貢輸恃險阻于淝河欲覲
覲于淝岸先于漁浦龜石翼張下營蕭山西陵鱗次列
砦烽燧交應鼙鼓相聞時我諸軍實有難色王乃潛趨
間道夜濟長江仰告昊天乞昏朗月當下寒雲匝野殺
氣凝空楚廟陰兵旁隨霧合晉臣黑幔闇與山連我師
忽震于雷霆彼砦俄崩于魂夢風號貔虎爭傳破竹之
聲陣卷龍蛇競集建瓴之勢賊將殷輪不暇漂杵有餘
僅身免以奔歸乃塞門而自守適後大小百戰首尾四

年方清鏡水之波始有蘭亭之地弔其生聚大布仁慈
誅彼渠魁不煩天討是王之功也次則有薛朗逐出周
寶自據朱方南襲毗陵西侵建鄴恣其剽劫務在殺傷
將乘中國之危擬扼長江之險王乃命二麾上將期一
月報功指其山川授以韜略蹄轂並舉水陸兼行曾不
旬時計平窟穴裏南宮萬于犀革視以囚人梟崔慧景
于鱗蓋彰其叛主是王之功也次則有徐約比是六合
鎮使既忝三吳郡符玉帛是求徵斂無度長時習戰齊

民固被雕黥比屋為軍魯儒亦遭翦削惟王聞其暴虐
奮激神威發上谷之精兵命下江之賢將授以九天九
地之訣傳以訓辭訓典之規扼斷咽喉清其郊野任約
之龍果睡王彌之豹徒飛食窘朝飢無由撫士計窮宵
遁遂至潰圍松陵之烟水重清香徑之黎元再活是王
之功也次則有孫儒恃有數萬兵甲不守淮南直欲別
遷土疆遂有江左刳人民為糧食隳舍宇為薪蘇餓鶻
飢鷹飛揚京口貪狼乳虎踐踏吳門漸逼由拳將窺雲

水王乃張天網于阻險闢地寔于要衝發水犀之驍雄
設燧象之機計青雀摩壘赤兔致師將持久以勝之俟
勢窮而必取守陴皆哭無食何為鳴鼓而攻脫身遂去
向使不施神畧不振王威則翼翼最靈皆成膏血茫茫
勝槩盡作煙煤所謂劬勞為時廣大及物是王之功也
次則有董庶人始鎮石鏡便牧杭州因破漢宏遂居越
土自形成象從纖至洪並是王之擢甲執兵左提右挈
以至手持旄節身爵王侯既滅頂于彛倫乃垂涎于神

器銅符金匱祥瑞亂興玉璽珠袍妖訛競起王以早同
楚歆夙共晉盟書尚緘膝血猶濡鋌牋函旁午誘勸交
馳諫既閉於屬垣禍遂成于覆族是時兩河倔強三輔
紛紜萬象雖拱于北辰一人不遑于南顧王請奉行天
罰所統便是國兵不費上供資財不役諸道將帥果見
桓玄計窘抽玉導以求生王莽勢窮轉銅威而厭勝喉
既舂于富父骨復專于會稽瀦其故宮焚其法物復我
正朔清我寰瀛五石補而天鏡明六合完而地維正是

王之功也王以平妖立霸時之業戲難建蓋世之功律
呂宮商鏘洋史籍丹青金玉與爛國華所以僖宗天子
仰我文昭睠我武烈龍光壓疊急使星馳綸綍使蕃大
王風起尋以耿純試理盧植兼才披錦衣以耀家鄉握
珪符而光松梓洎于昭皇飛昇大寶禮遇元勳龍悅召
雲鳧忻得藻嘉功賞德金鳳之詔連飛表異旌優玉麟
之符遂刻移南徐之藩翰就錢塘之江山節竦靈犀帳
開神虎三千珠甲光爛星辰十二牙旗文生組繡碧幢

纔建黃閭又開乃兼鎮于越藩遂對峙于漢節中天辰
象雖分牛斗之疆夾岸烟嵐映出東西之宅四縣既食
萬戶累加榮戟立門赤油羅列山河誓券丹字熒煌生
祠之籩豆鏘鏘衣錦之城隍黯黯而又特逾漢制封我
吳王茅分夏社之心桐翦周王之手昔也龍蛇起陸蹈
湯火以戰爭此際山川出雲見君臣之際會逮夫濟陰
王既傳天寶梁太祖遂應玄邈于王不易范張之故情
請結秦晉之嘉好恨無殊禮得展異恩于是追呂望之

高風擬山甫之美躅師尚父統攝三老作帝股肱尚書
令摠務萬機為天喉舌仍頒瑞節復陟齋壇建牙兼鎮
於揚州分閫遙臨于楚甸尋命兵部姚尚書洎作相躬持

鳳冊遠泛鯨波備周官之典儀封越國之土宇八鸞四
馬耀鏤錫以振鉤膺三節一王秉桓珪而垂玄玉及龍
德嗣君即位禮稱伯舅尊曰父師寅敬烈光虔奉顧命
是遣吏部李尚書燕捧持綸告繚遶湖湘受天下兵馬
都元帥洞庭彭蠡漸無不順之臣北狄西戎將有後予

之嘆昔韓信對漢高祖曰陛下能將將臣能將兵是知
元帥非人臣之職曹蓋帝王之兵柄推於前代隋煬帝
自晉王淮南行臺尚書令祇為行軍元帥天下之號國
朝肅宗皇帝駐蹕靈武日命代宗皇帝自廣平王而為
之德宗皇帝自魯王而為之梁太祖授九錫後而為之
斯天下元帥之故實也其後龍德帝復命兵部崔侍郎
協作相齎持簡冊浮泛風帆揚往典于明庭促及時而建
國奉召康公之命得以專征授唐叔虞之封良由吉夢

未久金行運息土德中興莊宗皇帝鵲起并汾龍飛宋
汴當寧不逾于旬朔臨軒宣諭于公卿曰吳越國王五
十年來常作稽天之柱三千里外每為捧日之雲今若
將致小康實在敬尊元老于是鸞臺進擬麟趾摘詞典
瑞獻功琢白珪而冊文粲爛職金供命鎔紫磨而印篆
盤珊重封吳越國王再授天下元帥馬遷十代史內固
是絕倫抑訾萬卷書中必無往例其建國也大君有命
明試以功自癸未而至壬辰備戰器而修王道先是中

欽定四庫全書

會稽擬英逸集
卷十七

三

朝名士在野遺人或負笈擔簦來投霸府或坼襦為袴
而詣軍門奮袖于嘉納堂中曳履于靈鈞臺上至此水
鏡裁鑒金秤等量並列庭臣皆居省署簪裾列侍文物
齊光張伯仁陳宗廟之儀鄭子產獻公侯之禮豈謂難
窮者大數莫究者彼蒼俄脫屣于具區遽徹縣于正寢
金山霧掩誰知帝召王喬玉海波空實痛神辭李廣况
十三州疆場百萬戶黔黎咸長養于恩膏悉生成于化
澤淚洒而晴空散雨愁凝而杲日沈雲鳥獸悲哀草木

慘沮明宗皇帝宣太常而定謚法召二卿而撰誄文鸞
輅龍旂贈禮優于鄧禹梓宮黃屋異數等於霍光得謂
盡始盡終極榮極貴享九九之仙壽近帝位于一爻感
萬萬之人心歆神道于千祀有後如此又何缺焉我天
下兵馬元帥吳越王當燕族之多奇承趙宗之後世嵩
衡泰華秀氣俱騰淮濟江河榮光共結是時肩主誕我
國祥紹經文緯武之基襲積德累仁之業開襟奮臆伏
雄傑于周瑜誓衆臨戎統人豪于張袞風儀則懸星溢

欽定四庫全書

會稽掇英逸集
卷十七

三十一

背紫電揚鹽霜雪凝肌魚龍入髮仙應有分貴不可知
宋弁聲姿尤閑進對竇融詞氣唯是卑恭加以青雲常
在于言談畏日不離于顧盼徐行緩步褚彥回却是趨
蹌散幘斜簪王文憲殊非蘊藉智畧則鮑叔雖矢應手
而來顧和珪璋遇機方露遠者大者一剛一柔靜則心
照鏡而貌懷冰含和六氣動則火炎山而湯湧海懼懼
萬人機變則管葛才高孫吳術妙身丈虎豹隱見不常
義府戈矛短長迭用三雋才既為已任六奇策固是無

遺卻殺詩書經綸國計項羽雷電振動兵籌漆睇而莫
測金泉旁窺而罔知珠岸詞藻則青霜皓月絡繹綵牋
芳草落花飄颺鏤管織成夢錦散出神霞英變屢奇張
融之言信矣凌顏鑠謝元葉之論宜然札翰則早受義
方曾傳掣筆鸞迴雀反氣勢驚人金錯銀鈎縱橫入木
按牘無非墨陣宮寺爭耀寶牌崔宏之本草無光張育
之折蒲失色立功則我王初離太學始統親兵鄭世子
方欲平齊汝陰王正思安漢屬隣國侵軼命將曰李濤

僅二萬兵下百里砦圍逼安國涎喙餘杭我王虔奉訓辭遂昇上將清風授式黃石傳書親蒙韓奕之黃熊躬仗封丈之白虎攻東南而備西北事在機先掩五壘而出三門別馳神筭于是崩摧大陣擒獲萬人道路隘于俘囚山川積于戈甲餘敵作氣既竭方遁于潛我則乘勝追奔又平廣德未出一百里之境復降五千來人唱凱歌而喜氣連郊整班師而雄風掠地尋即大統龍艦遠泛鼇溟巡江陰而收東州入海門而觀北固彼境遂

陳舟楫遠出枝梧我則陳二廣于浪港沙前設三覆于
石牌彎內零陵石灰風便爭投于蛟蜃窟中沁水火杙
油燃葬于鯨鯢腹裏一戰定霸二紀無虞寰海具瞻將
相迭耀聲光丕顯裴松為廊廟之人功業昇聞段襄居
骨鯁之任爰自嗣承國構纘奉王基况當跪箭之初又
在寢苦之內芝蘭龍鳳三千餘口之家風鉄石虎貔二
十萬人之軍府誠難撫御豈易緝綏我王以孝為模用
仁作範無所不可惟言是從嘉惠寵靈供承花萼油雲

膏雨潤澤閨門此外習武益兵輕刑慎罰德無脛而遠
屈名無翼而遐飛果動大朝繼鍾異寵三年之內兩冊
連封雙龍之金節齊行四馬之寶車並輶玉具冠劍見
王者之尊崇織文旂裳觀國容之貴盛我王因茲顯赫
益動孝思無以答先后之恩無以報昊天之德且曰武
肅王有大功及天下大名振寰中庇生民而百萬有餘
築城壘僅五十來處豈可不建廟貌不像真容為星紀
之福宮作地戶之神主爰命興武中直都虞侯姚敬思

于馬榛湖畔勾踐城中選闔閭形勢之中區得顯敞高
平之勝址于是鉞杵俱下畚鍤齊興隱隱雷聲轟轟岳
振不十旬而展役市千丈之隆基大梓文枿匪自秦山
伐得宏梁巨棟非因漳水飄來雕鐫者王母玄圖甃砌
者赫連繡石斤揮斧運削出銀葩水鑿沙磨方成玉碣
符玄武之嘉兆應神著之吉辰始乃架險梯虛雲構山
屹陰虬迴抱陽馬奔趨虎牙銜而析拱連龍脊裹而欒
櫺轉瓊瑤耀壁丹漆明簷鴛鴦之瓦縫界成芙蓉之埽

文印出即以丙申歲秋八月十有七日我王備鹵簿鼓
吹車輅旂常北司侍臣南班舊列奉迎真像而入祠宮
白檀雕出聖容黃金鏤成寶座儀形酷類神彩如生鳳
目龍章顏猶不破垂旒被袞人見興悲禮器則俎豆犧
娒軒懸則祝敔鐘磬後殿暈衣雉服文母賢妃露幔珠
屏蝦簾象榻不異昔時秘寢皆同曩日深宮前則廣厦
交陰芳亭對構紫石伏狻猊之影朱欄交菡萏之光正
啟重門並立神將侍衛兵仗矛戟森然文武官班簪裾

肅列直出甬道千步有餘河枕投醪波通射的蓮芰遶
于水閣桐桂夾于星橋左則迴抱粉廊連延綺棟並圖
曹署各列司存乃至早世勲臣無祿公子皆塑儀像並
配薦羞右則脩廡飛甍綠窗丹牖陰兵神馬見雷電而
沒風雲明牢淨厨備粢盛而烹肥腍景物則高杉矮檜
粉竹金松夾砌名花連階瑞草烟嵐蓊蔚便是陰宮雲
霧濛籠居然神府我王昔以致君之業累殄寇戎今立
顯考之祠而修孝敬所以天朝繼封王爵以耀國章黃

欽定四庫全書

會稽擬英德集
卷十七

三五

金印印宇內徵呼元帥帥天下侯伯卓絕殊勲洪業所謂炙地熏天設使書剡谿九萬之牋不能盡紀勒華山五千之仞亦恐難窮光業也詞不夢于王掾才匪量于曹斗擬奚斯之頌或恣麤心對豫章之碑豈合措手但以二紀幕客千載庭臣不求孫綽擅名豈望楊脩絕妙所希編述用答恩知追感先王恭為銘曰

崧高嶙峋

是生哲人

上天師子

出澤麒麟

錢尊殷祖

鄴肩唐臣

衣冠表裏

文武經綸

廣運將新

大盜斯起

雁象歎驚

鳧毛亂委

紫蓋蒙塵

黃巾多壘

既戮憲章

又裂文軌

武肅英王

提劍東方

龍行雲雨

虎變文章

字氣沃酒

妖雪歸湯

洗滌星紀

整頓天常

告功狼居

圖形麟閣

桐珪聯編

茅土續索

三道犀幢

八朝鳳諾

丹券家門

錦衣城郭

元帥天下

國王具區

六瑞琢冊

三品鑄符

尚父四履

尚書萬樞

崦嵫高壽

曦赫霸圖

我王奉天

為時而出

傳寶應金

繼明趙日

國士無雙

風華第一

削樹平戎

夢禾受秩

功既挺世

德又動天

襲封二冊

嗣位三年

金印國寶

元帥兵權

忠無瑕纈

孝絕雕鐫

未禡墨衰

乃建清廟

臥龍之城

會稽之嶠

嵐界迴廊

粉明周塲

廣殿霞開

重門岳峭

瑞玉禮器

香檀聖容

民之祀主

我之神宗

秉翟執籥

特磬編鐘

燃蕭燔臠

冥幣輸琮

於穆祠宮

煥焉陰府

五齊恒馨

六佾常舞

饋薦房烝

歌隨路鼓

令子懿孫

光今顯古

陶朱公廟碑

吳處厚

窮之與達繫乎命用之與舍繫乎時得之與喪在乎天
去之與就在乎我四者古君子出處之大節而公皆得
而兼之不亦智矣乎公之事業最詳于國語史記與吳
越春秋當是之時越與吳相持幾三十年吳常勝越常
敗吳譬則虎越譬則鼠吳譬則狼越譬則羊句踐之命
在于夫差掌握中數矣公力與臯如計倪諸暨郢大夫

種

四人皆越大夫

諸臣間闕險阻未嘗少變其節乃說句踐卑

辭重幣頓顙屈膝籍其管庫質其妻子為吳奴虜及囚石室又說飲洩嘗惡以媚夫差而夫差不寤乃伐齊而赦越復貪與諸侯會于黃池及越焚姑蘇入其郛猶與晉公午爭長不以為恤既而民疲歲飢禍稔數極公卒與越之君臣因其困乘其弊一舉而滅之故曰持盈者與天定傾者與人節事者與地此之謂乎君王之恥既雪霸國之業已成在于他人則邑萬戶祿萬鍾為師尚

父寵之終身固其宜也公獨不然以為功名不可以多得富貴不可以長保瞥然輕舟飄然五湖投紳笏如柴柵棄妻孥如敝屣冥冥而飛汨汨而遊網不能絪繳不能弋烏喙雖長而不能啄屬鏤雖利而不能割存耶亡耶死風波耶葬魚鼈耶泛溟渤登蓬萊而遂羽而仙耶俱不可得而知也徒使越人愛之不忘念之不足鑄金而禮其像環地而封其域與夫貪權冒寵市禍賈患而遂脂鼎鑊血刀鋸為魚為肉為菹為醢者豈同年而語

哉余嘗按越之圖經得公廟于諸暨陶朱山下俗說公
本諸稽人今淨觀院即其故宅也鄉曰陶朱之鄉巖曰
范蠡之巖井曰鴟夷之井皆以公而得名也年紀夏閏
不可得詳廟宇庳窄蕪壞不治屬歲荐飢民又乏饗余嘗
至其下徘徊觀覽惻然于懷者數四蓋碑者悲也君子
所以述往事悲來今者也因書以為弔焉其辭曰

越山疊疊兮越水環環公有廟貌兮山水之間屋三其
架兮門鐫戶闕庭堦不治兮鞠草衰菅豚蹄之饗兮歲

歎民慳香火聞冷兮巫休祀門額廊哽雨兮古木號寒
餓鼠晝嘯兮飢鴟暝還功磨日月兮名揭丘山遺像可
揖兮高風莫攀我來愴古兮憤涕一潛秋色著樹兮霜
葉初殷青史傳信兮灼不可刪千古萬古兮雲凝石頑

蕭山縣正覺院新修浴室銘

并序

謝絳

蕭山正覺精舍有浴室不理邑人王氏宸方理之功未
究且卒曰張承祐者喟然歎曰王君長者既倡事吾宜
卒其善乃出貲五百緡于主僧繼符募工購材取于精

良考室除器既而畢就燂湯五日若合禮經擊鼓十方以集來者納履常滿振衣後出盡被垢漬以舍吉祥夫人內欲安舒而外必疊潔二者得之于道未有體幹躁害而心術平和余不習釋氏言聞其談湎室之利甚著且博或者無加此焉王氏有子殿中丞絲與余同升傷先人之勤且欲有表故余為之叙而系以銘

浴乎其不可以廢
室壞器亡乃如是

誰能興之曰王氏
奮然倡先後有繼

室完器修無慮備

來者疏濬而滿志

幹和心舒道可至

浴乎其得以言利

會稽掇英摠集卷十七